

dann die Buchstaben genugsam außweisen/ als G.H.M.N.L.P. Welches dan die lenge dieser Ladשאuffel ist: vnd ist diß nun die gemeine theilung/ nemlich auff die art vnd formb/ den Zirkel nicht zu erweitern in des Diameters höhe/ oder auff vnd zu zuthunde/ welches dann künfftig zu seiner Zeit nach mit viel schönern Figuren sol angezeigt werden.

## Das XV. Capittel.

**N**un wil ich dir weiter zur Wissenschaft/die Läuterung des Salpeters/ vnd wie du füglich den Schwebel præpariren vnd bereiten sollest./ benebenst etlichen Puluersazen/ berichten vnd anzeigen.

**Wissenschaft des Salpeters Läuterung/ vnd wie man denselben auß der Erden herfür bringen kan/ vnd wie man nemlichen rohen Salpeter sol Läutern/ daß er ganz sauber vnd schön weiß werde/ vnd daß das Salz vnd andere vnreinigkeiten möge darauß kommen/ so verfare darmit/ wie hernach folget:**

**Welche Erden zum Salpeter sieden dienstlich vnd gut ist.**

**D**ie beste Erden/ die am Salpeter am reichesten/ vnd nicht viel Salz hat/ ist die Erden/ auß den alten verlegnen Schaffställen/ die fast treug/ vnd nicht naß ist: Die ander Erden/ die auch guten Salpeter gibet/ ist der Kalck oder Leim/ von den gar alten Mawren/ die an einem orte/ oder in einer Stadt/ da das Erdreich desselben Landes/ an sich selbst Salpeterisch ist/ nicht fast zu naß am Regen/ auch nicht gar aller wegen treug gestanden hat/ sondern bißweilen feucht worden/ vnd dann die Sonne wieder daran hat scheinen können/ nach dieser ist die Erden/ die von zerbrochnen Kalckmawren/ da man Häuser eingestrisen/